

মানুষের ভিড়ে মিশতে বাজারে উগান্ডার প্রেসিডেন্ট

ডেস্ক রিপোর্ট

(তেল সংকটে সংবাদ পৌঁছাতে এক মাস দেরি)

উগান্ডার প্রেসিডেন্ট সাধারণ মানুষের অবস্থা নিজ চোখে দেখতে শহরের সবচেয়ে বড় কাঁচাবাজারে মাংসের দোকানে উপস্থিত হলেন।

প্রেসিডেন্ট (মাংসের দোকানের কসাইকে): কেমন আছো? বেচাকেনা ভালো তো?

দোকানদার: বেচাকেনা এমনিতে ভালো। তবে আজ বিক্রি একদম বন্ধ।

প্রেসিডেন্ট (বিস্মিত কণ্ঠে): কেন কেন? আজ বিক্রি বন্ধ কেন?

দোকানদার: আপনি পরিদর্শনে আসছেন বলে কোনো ক্রেতাকে আজ বাজারে ঢুকতে দেওয়া হয়নি। আপনি চলে যাওয়ার পর পরিস্থিতি স্বাভাবিক হবে।

প্রেসিডেন্ট (সহানুভূতির সুরে): মন খারাপ করো না। আজ আমিই হবো তোমার প্রথম কাস্টমার। ওই রানটা থেকে পাঁচ কেজি মাংস কেটে দাও দেখি।

দোকানদার: দুর্গখিত, স্যার! দিতে পারবো না।

প্রেসিডেন্ট (হতবাক হয়ে): পারবে না, মানে

দোকানদার: জি, মহামান্য। আপনার নিরাপত্তার কথা চিন্তা করে বাজারের সব ছোট বড় চাকু-ছোরা-

বটি বাজেয়াপ্ত করা হয়েছে। তাই রান থেকে মাংস কাটার কিছু নেই।

প্রেসিডেন্ট (কিছুটা সামলে নিয়ে): ঠিক আছে, কাটাকুটির ঝামেলায় গিয়ে লাভ নেই। আমাকে পুরো রানটাই দিয়ে দাও। তার আগে ওজনটা মাপো আর একটু পরিষ্কার করে দিয়ো।

দোকানদার: এসবের কিছুই আমি পারি না, স্যার প্রেসিডেন্ট: কেন?

দোকানদার: কারণ, আমি কসাই নই।

প্রেসিডেন্ট (প্রচণ্ড রেগে গিয়ে): তুমি কসাই না, তবে মাংসের দোকানে বসে আছো কেন

দোকানদার: আপনার নিরাপত্তার কথা বিবেচনা করে বাজার থেকে সবাইকে বের করে দিয়ে প্রত্যেক দোকানে ইন্টেলিজেন্সের লোক বসানো হয়েছে, স্যার। আমি নিজেও তাদেরই একজন।

প্রেসিডেন্ট (রাগের সাথে): আমার সঙ্গে ফাইজলামি! ডাকো তোমার কমান্ডারকে। এর কৈফিয়ত তাকে দিতে হবে।

দোকানদার: উনাকে ডেকে লাভ নেই, স্যার। উনি নিজে মাছের দোকানদার সেজে আপনার জন্য বড় বড় রুই-চিতল নিয়ে অপেক্ষা করছেন।

হারিকেনের আলোতে পড়ে এ+ পাওয়ার জন্য চব্বিশ ঘণ্টাই লোডশেডিং চান এসএসসি পরীক্ষার্থীরা

ডেস্ক রিপোর্ট

(ফেসবুক কमेंট ঘেঁটে সংগৃহীত)

চলছে এসএসসি পরীক্ষা আর তার সাথে পাঞ্জা দিয়ে চলছে লোডশেডিং! সমস্যা মনে না করে বরং আরও বেশি করে লোডশেডিং চাচ্ছেন পরীক্ষার্থীরা! জানা যায়, শুধুমাত্র হারিকেনের আলোতে পড়ে এ+ পাওয়ার জন্যই এমন উদ্যোগ নিয়েছেন তারা।

রিয়ান নামের এক তরুণীর বলেন, ‘আপনিই বলেন, এ পর্যন্ত যারা বিখ্যাত হয়েছেন, দেশের জন্য শিক্ষাখাতে কিছু না কিছু করেছেন, তারা কি লাইটের আলোতে পড়ে এসব করেছেন? হারিকেন, মোমবাতি, সিগারেটের আলোই তাদের সাফল্যের পেছনের মূল কারণ। তাই আমরাও চাই না আমাদের হাত থেকে সাফল্য ছুটে যাক! লাইটের আলোর নিচে পড়ে এ+ কেন এ ডাবল প্লাস আনলেও কেউ পাস দিবে না। আমাদের দরকার হারিকেনের আলো!’

রিয়ান বন্ধু আরিফ বলেন, ‘এমনিই তো দিনের মধ্যে ৫ থেকে ৬ বার কারেন্ট যাচ্ছেই। হিসাব করে দেখলে ৭ থেকে ৮ ঘণ্টা কারেন্ট থাকে না! তো আরও কয়েকঘণ্টা বাড়ায় লোডশেডিং করলে সরকারের খুব একটা ক্ষতি হয়ে যাবে না, বরং লাভই হবে। এদিকে আমরাও হারিকেন, মোমবাতি এসবের আশ্রয় নিয়ে দেশের ভবিষ্যত হয়ে তিন পায়ে দাঁড়াতে পারব।’

এদিকে তাদের সাক্ষাৎকার শুনে এখনই বাজার মালিক সমিতির বাজারে গণহারে হারিকেন ও মোমবাতি নামাচ্ছেন! তারা বলেন, ‘এই দেশ মানুষের জন্য ৮ ঘণ্টা লোডশেডিং দিচ্ছে ২৪ ঘণ্টা আর এমন কী! দিবে দিবে তোমরা চালায় যাও, আমরা আছি।’

লোডশেডিংয়ের সংকটে ‘শইল্লে অনেক কারেন্ট’ওয়ালা মানুষদের এগিয়ে আসার আহ্বান

ডেস্ক রিপোর্ট

(চিত্তার অতিরিক্ত চাপে প্রস্তুত)

জ্বালানি সংকটের কারণে দেশে শুরু হয়েছে তীব্র লোডশেডিং। পরিস্থিতি সামাল দিতে সরকার ইতোমধ্যে শপিংমল ও দোকানপাট দ্রুত বন্ধ করার সিদ্ধান্ত নিয়েছে। তবে জনগণের একাংশ মনে করছে, এত কষ্ট করে বিদ্যুৎ উৎপাদনের দরকার নেই; দেশে যেহেতু ‘শরীরে অনেক কারেন্ট’ওয়ালা মানুষ আছে, তারা একটু দায়িত্বশীল হলেই সমস্যার সমাধান হয়ে যাবে।

রাজধানীর এক মোড়ে দাঁড়িয়ে এমনই এক সচেতন নাগরিক বলেন, আমরা বাঙালি, আমাদের শরীরেই তো অনেক কারেন্ট। একটু ইচ্ছা করলেই আমরা নিজেরাই লাইট জ্বালাতে পারি। সরকার শুধু একটা মাল্টিপ্লাগ দিলেই হয়। তিনি আরও যোগ করেন, প্রয়োজনে দেশের প্রতিটি এলাকায় দুই-তিনজন করে ‘কারেন্টসমৃদ্ধ’ মানুষকে দায়িত্ব দেওয়া যেতে পারে। এতে বিদ্যুৎ বিভাগও একটু ছুটি পাবে, আর জনগণও নিজের শক্তির ওপর



কৌতুক

(ওয়াইফাই সিগন্যাল দুর্বল থাকাকালীন লেখা)

বিলু: শুনেছ, লাইব্রেরিতে ভয়াবহ ঘটনা ঘটেছে!

রঞ্জু: কেন, কী হয়েছে?

বিলু: কেউ একজন ডিকশনারিতে ডিনামাইট খুঁজে

পেয়েছে!

শিক্ষক প্রশ্ন করলেন,

: বিদ্যুৎ বিভাগের মালিক কে, বলো তো?

: আমার মামা, স্যার।

: বলে কি ছেলে! তোমার মামা মালিক হতে যাবেন কেন?

: কারণ বিদ্যুৎ চলে গেলেই বাবা চিৎকার করে বলেন, ‘শালার কারেন্ট আবার গেল!’

ধর্ম ক্লাসে স্বর্গ, নরক ব্যাখ্যা করার পর শিক্ষক প্রশ্ন করলেন, ‘তোমরা কে কে স্বর্গে যেতে চাও হস্ত তোলো।’

সবাই হাত তুললো। শুধু একজন ছাড়া।

: কী ব্যাপার, তুমি স্বর্গে যেতে চাও না?

: না স্যার, আমরা আজ তাড়াতাড়ি বাড়ি যেতে বলেছে।

একদিন পাকিস্তানি সেনাক্যাম্পের সামনে একটা ছোট বাঙালি ছেলে একটা ছাগল চরাচ্ছিল। খানসেনারা ভাবল, ওর সঙ্গে একটু মজা করা যাক।

একজন সেনা বলল, ‘কি হে, নিজের ভাইকে এত জোরে জোরে পেটাও, এত নির্দয় কেন তুমি?’

ছেলোটা বলল, ‘কী করব? না পেটালে তো এত দিনে খানসেনাদের দলে গিয়ে ভিড়ত।’

রেলওয়েতে চাকরির ইন্টারভিউ হচ্ছে। একটি চটপটে ছেলেকে সবার পছন্দ হলো। চেয়ারম্যান একটু বাজিয়ে নিতে চাইলেন...

চেয়ারম্যান: ধরো, একটা দ্রুতগামী ট্রেন আসছে। হঠাৎ দেখলে লাইন ভাঙা। কী করবে তুমি?

ছেলে: লাল নিশান ওড়াবো।

চেয়ারম্যান: যদি রাত হয়?

ছেলে: লাল আলো দেখাব।

চেয়ারম্যান: লাল আলো যদি না থাকে?

ছেলে: তাহলে আমার বোনকে ডাকবো।

চেয়ারম্যান: কেন? সে কী করবে?

ছেলে: কিছুই করবে না। ওর ট্রেন অ্যাক্সিডেন্ট দেখার শখ অনেকদিনের।

সরকারি দলের এক নেতা জ্বালাময়ী বক্তব্য রাখছিলেন। বক্তৃতা শেষে হাত তুলল এক দর্শক। ‘আপনি কিছু বলতে চান?’ নেতার প্রশ্ন।

‘হ্যাঁ, আপনার বক্তৃতার প্রতিটি শব্দ একটি বই থেকে নেয়া।’

শুনে নেতা খতমত খেয়ে তোতলাতে তোতলাতে বললেন, ‘কী বলতে চান, আ-আপনি? কোন বই?’

‘বইটা আমার বাসায় আছে।’

‘আমি বইটি দেখতে চাই।’

‘বেশ আমি বাসায় গিয়ে বইটি পাঠিয়ে দিচ্ছি।’

নেতা বইটি পেলেন কিছুক্ষণ পর। বইটি একটা বাংলা ডিকশনারি।

বৈশ্বিক অর্থনৈতিক মন্দার কারণে সিসি ক্যামেরার দায়িত্ব পালন করছেন শিক্ষামন্ত্রী এহসানুল হক মিলন

ডেস্ক রিপোর্ট

(তেল সংকটে সংবাদ পৌঁছাতে এক মাস দেরি)

বিশ্বজুড়ে যখন যুদ্ধের দামামা বাজছে, অর্থনীতির চালিকা শক্তি তেলের দাম যখন আকাশচুম্বী, তখন খুব স্বাভাবিকভাবেই দেশের অর্থনীতিতে মন্দাভাব চলে এসেছে। এই নাজুক পরিস্থিতির চাপ সামাল দিতে অভিনব এক উদ্যোগ নিয়েছেন শিক্ষামন্ত্রী এহসানুল হক মিলন। শিক্ষা প্রতিষ্ঠানে নতুন করে সিসিটিভি ক্যামেরা না লাগিয়ে নিজেই পালন করছেন সিসিটিভি ক্যামেরার দায়িত্ব।

শিক্ষা মন্ত্রণালয়ে রুদ্ধধার এক বৈঠকে অংশ নিয়ে শিক্ষামন্ত্রী বলেছেন, দেশে এক সময় সিসিটিভি ক্যামেরা বলে কিছুই ছিল না। তিনি হেলিকপ্টারে করে ঘুরে ঘুরে হিউম্যান সিসিটিভির মতো নিজের দায়িত্ব পালন করেছেন। রক্তে এখনো সেই উন্মাদনা বয়ে বেড়াচ্ছে; অর্থনীতির এমন নাজুক অবস্থায় সিসিটিভির পেছনে খরচ করার কোনো মানেই হয় না। তিনি নিজেই যদি সিসিটিভির মতো নজর দিতে

পারেন, তাহলে নতুন করে সিস্টেম দাঁড় করানোর কোনো মানেই হয় না।

স্বপ্নে শুধু নকল আর নকলের ছড়াছড়ি দেখে চিংকার করে ঘুম ভেঙে যাচ্ছে বলে জানিয়েছেন তার পাড়া-প্রতিবেশীরা। ঘুম ভাঙলেই আর নিজেকে ঠিক রাখতে না পেরে মধ্যরাত্রেই নাকি ড্রাইভারকে গাড়ি প্রস্তুত করতে বলছেন; স্বপ্নে বার্তা পেয়েছেন কোথায় কোথায় ছাত্ররা নকল লিখছে, তাই রাত্রেই অভিযান চালাতে হবে।

শিক্ষামন্ত্রীর অভিনব উদ্যোগে মিশ্র প্রতিক্রিয়া দেখাচ্ছেন সাধারণ শিক্ষার্থীরা। কারো কারো মতে, এমন মানব সিসিটিভি থাকলে দেশের শিক্ষাব্যবস্থার এক আমূল পরিবর্তন আসবে, যেটা লাখখানেক সিসিটিভি দিয়েও সম্ভব না। আর স্বপ্নযোগে কারা কারা নকল বানাচ্ছে, এমন খবর পাওয়া তো চাটখানি কথা না! এমন দৈববাণীর সাহায্য যিনি পান, তার মাধ্যমেই দেশের শিক্ষা ব্যবস্থাকে আন্তর্জাতিক মানে উন্নীত করা সম্ভব।

ভিএফএক্স বাজেট কমাতে মোহাম্মদপুর চায় হলিউড

ডেস্ক রিপোর্ট

(ঘটনাস্থলে না গিয়েই ঘটনাবহুল)

প্রথম আলো'র করা এক প্রতিবেদনে মোহাম্মদপুরকে দেওয়া হয়েছে নতুন তকমা 'ঢাকার সিটি অব গড'। ২০০২ সালের 'সিটি অব গড' নামের ব্রাজিলিয়ান সিনেমায় দেখানো গল্পের সঙ্গে মোহাম্মদপুরে সম্প্রতি ঘটে যাওয়া ঘটনার মিল দেখেই এ তকমা পেয়েছে এলাকাটি। হলিউডের কলাকৌশলীদের কানে এ খবর যেতেই তারা নড়েচড়ে বসেছেন। তারা বলেন, এটি তাদের জন্য অভাবনীয় এক সুযোগ। একটি দৃশ্যের ভিএফএক্সের পেছনে তাদের যে পরিমাণ খাটখাটনি করতে হয়, তাতে শেষ পর্যন্ত খরচের পরিমাণ আকাশচুম্বী হয়ে যায়। এক ভিএফএক্সেই পুরো বাজেটের প্রায় দুই-তৃতীয়াংশ খরচ হয়ে যায়। তাই গাদা গাদা টাকা খরচ করে ভিএফএক্সে দৃশ্য ধারণ করার চেয়ে মোহাম্মদপুরে এসে সরাসরি চলমান জীবন্ত অ্যাকশন দৃশ্য ধারণ করা, এক ঢিলে শুধু দুই নয়, তিন পাখি মারার সমান! খরচ তো কমবেই, সঙ্গে সময়ও কমবে, আর ধারণকৃত দৃশ্য হবে আরও প্রাণবন্ত। ভিএফএক্সকে জীবন্ত দেখানোর প্রচেষ্টা থেকে মুক্ত হয়ে হাফ ছেড়ে বেঁচেছেন কলাকৌশলীরা।

মোহাম্মদপুর হলিউড ইউনাইটেড অ্যাসোসিয়েশনের সভাপতি বলেন, হলিউড আসা তো কেবল সূচনা মাত্র। আমরা হলিউডকে শুধু বাড়তি খরচ থেকে বাঁচাতে এ উদ্যোগে সাড়া দিইনি; বরং পৃথিবীর অন্যান্য দেশগুলোও যাতে সিনেমা বানাতে মোহাম্মদপুরে আসে, তার ভিত্তি গড়ে দিতেই হলিউডের সঙ্গে অংশীদারিত্বে গিয়েছি। এতে এ এলাকার নাম যেমন পুরো পৃথিবীতে ছড়িয়ে পড়বে, তেমনি মোহাম্মদপুর দেশের জিডিপিতেও অবদান রাখবে।

গোপন সাক্ষাৎকারে ক্রিস্টোফার নোলান বলেছেন, সবাই শুধু সাময়িক লাভ নিয়ে পড়ে থাকে।

মোহাম্মদপুরকে বেছে নেওয়া শুধু ভিএফএক্স নয়, সঙ্গে আরও বাড়তি কিছু সুবিধা এনে দেবে। যেমন, দুই মিনিটের বৃষ্টিতেই ঢাকার রাস্তা ডুবে মিনি কক্সবাজার হয়ে যায়। সেক্ষেত্রে ভেসে যাওয়া বা ডুবে যাওয়ার দৃশ্য তৈরিতে সমুদ্র পর্যন্ত যাওয়ারই প্রয়োজন পড়বে না। আগে জানলে টাইটানিক এখানেই বানিয়ে ফেলতাম। আবার গরমে রাস্তার পিচ গলে যায়, দু'ভাগ হয়ে যায়, ব্রিজ বানানোর পরদিনই ভেঙে পড়ে, একবার ভাবুন তো, এসব দৃশ্য পর্দায় দেখাতে কতখানি পরিশ্রম হয়! মোহাম্মদপুরে হলিউড আসা শুধু আর্থিকভাবেই নয়, বরং অমানুষিক খাটুনি থেকেও উদ্ধার করবে।



রবীন্দ্রনাথ ঠাকুরের জীবনের মজার ঘটনা

ডেস্ক রিপোর্ট (সংগৃহীত)

একবার এক ভদ্রলোক রবীন্দ্রনাথের কাছে কলম ধার চাইলেন। তিনি কলম চাওয়ার সঙ্গে সঙ্গে জিজ্ঞেস করলেন, আপনি কি এই কবিতার দ্বিতীয় লাইনটা জানেন? প্রথম লাইনটা হচ্ছে 'সকল পক্ষী মৎস্য ভক্ষী, মৎস্যরাঙ্গী কলঙ্কিনী'। রবীন্দ্রনাথ কলমটা দিয়ে বললেন, 'নিশ্চয়ই জানি। লাইন দুটো দাঁড়াল এ রকম : সকল পক্ষী মৎস্য ভক্ষী, মৎস্যরাঙ্গী কলঙ্কিনী। সবাই কলম ধার চেয়ে নেয়, আমিই শুধু কলম কিনি!'

মরিস সাহেব ছিলেন শান্তিনিকেতনে ইংরেজি ও ফরাসি ভাষার অধ্যাপক। একা থাকলে তিনি প্রায়ই গুনগুন করে গান গাইতেন। একদিন তিনি তৎকালীন ছাত্র প্রমথনাথ বিশীকে বললেন, 'রবীন্দ্রনাথ চিনির ওপর একটি গান লিখেছেন, গানটি বড়ই মিষ্টি।' অতঃপর তিনি গানটি গাইতে লাগলেন, 'আমি চিনি গো চিনি তোমারে, ওগো বিদেশিনী, তুমি থাকো সিন্ধুপারে...।' 'তা চিনির গান তো মিষ্টি হবেই। কিন্তু এই ব্যাখ্যা আপনি কোথায় পেলেন?' প্রমথনাথ বিস্মিত হয়ে তাঁকে প্রশ্ন করলেন। উত্তরে মরিস সাহেব জানালেন, 'কেন, স্বয়ং রবীন্দ্রনাথ আমাকে বলে দিয়েছেন।'

রবীন্দ্রনাথ একবার এক ভদ্রলোককে বললেন, 'আপনাকে আমি দণ্ড দেব।' ভদ্রলোক তো ভীষণ বিব্রত। না জানি কী অপরাধ হয়েছে তার। বললেন 'কেন, আমি কী অপরাধ করেছি?' রবীন্দ্রনাথ বললেন, 'গতকাল আপনার লাঠি মানে দণ্ডটা আমার এখানে ফেলে গিয়েছিলেন। এই নিন আপনার দণ্ড।' বলে তার দিকে লাঠিটা বাড়িয়ে ধরলেন।

কৌতুক

(কাল্পনিক হলেও পরিচিত মনে হতে পারে)

স্কুলের পরীক্ষায় প্রশ্ন এসেছে, 'লস অ্যাঞ্জেলেস থেকে লন্ডনের দূরত্ব ৮০০০ কিলোমিটার। একজন লোক লস অ্যাঞ্জেলেস থেকে গাড়িতে ঘণ্টায় ১৫০ কিলোমিটার বেগে লন্ডন রওনা হলো এবং অপর এক ব্যক্তি লন্ডন থেকে গাড়িতে ১৬০ কিলোমিটার বেগে লস অ্যাঞ্জেলেসে রওনা হলো। তাদের দুজনের কোথায় দেখা হবে?'

উত্তর লিখল, 'জেলখানায়! এত জোরে গাড়ি চালাবেন, পুলিশ বুঝি আঙুল চুষবে?'

একটা লোক পাবলিক টয়লেটে বসে ছিল। হঠাৎ করে পাশের টয়লেট থেকে শব্দ আসলো, 'মিয়া ভাই কেমন আছেন?' লোকটি অবাক হয়ে বলল, 'হ্যাঁ, আমি ভাল আছি।'

আবার শব্দ আসলো, 'কী করছেন ভাই?' সে চিন্তিত হয়ে উত্তর দিল, 'এইতো ভাই, কমেড এ বসে আছি।' পাশের টয়লেট থেকে আবার বলল, 'আমি কি আসতে পারি?' লোকটি ঘাবড়ে গেল এবং বললো, 'না না না প্লিজ, আমি ব্যস্ত আছি।'

আবার কণ্ঠ শোনা গেল, 'আচ্ছা ভাই, আমি আপনাকে ৫ মিনিট পরে আবার ফোন দিচ্ছি, কোন গাধা জানি আমার সব কথার উত্তর দিয়া আমার লগে ফাইজলামি করতাকে...'